

Lavur da perschuasiun

Il Forum cultural Tujetsch mira anavos sigl onn passau

(anr/hh) **El center dallas activitads dil Forum cultural Tujetsch digl onn vargau ein la restauraziun e conservaziun dalla ruina da Putnengia a Dieni stadas. En quei connex ha oravontut la finanziaziun pretendiu in grond ed intensiv engaschi.** Damaun, venderdis, salva il Forum cultural Tujetsch sia sisavla radunonza generala a Sedrun. La suprastonza cul president André Schmid alla testa vegn a dar in sguard sin la lavur digl onn vargau, respectivamein in'egliada egl avegnir. En vesta alla radunonza han ils responsabels publicau il rapport annual 2003/04. El dat in'investa detagliada dil curriu e passau.

Dapli renconuschientscha

«Cultura gauda aunc adina memia pauc renconuschientscha e consequentamein il sustegn giavischau. Quella situaziun ha en emprema lingia consequenzas sil sustegn finanziel», constatescha André Schmid. Perquei han las persunas che s'engaschan a favur dalla cultura da prestar di per di lavur da perschuasiun, per aschia contonscher lur finamiras. Quellas ein denton realisablas mo cun igl agid d'ordeifer, vul dir da pliras varts. Il project principal dil forum ei la restauraziun e conservaziun dalla ruina dil casti da Putnengia a Dieni. Las empremas lavurs ein fatgas. En connex cun la secunda etappa che sespleiga il mument han ils restauraturs fatg interessantas scopertas. Svegliau igl interess dil survetsch archeologic dil cantun Grischun han surtut l'entrada avon il foss principal ed ina annexa avon il casti. Fascinai dallas lavurs fatgas entochen ussa e spanegiai sil resultat final ein era ils responsabels digl Uffeci da monuments historics dil cantun Grischun che han priu investa avon biebein in meins dil plazzal.

Alla tscherca da daners

L'emprema etappa dalla conservaziun ha custau rodund 70 000 francs. Ils cuosts han saviu vegnir cuvretgs cun ina donaziun finanziaria dil cantun ella rama da 42'600 francs, sco era cun ina contribuziun dalla vischnaunca da Tujetsch da 40'000 francs. Uonn ei previu d'investar 60'000 francs. Ils cuosts totals per la restauraziun ein calculai cun 240'000 francs. La finamira dil forum eis ei da terminar las lavurs el decuors digl onn 2006. La finanziaziun ei denton aunc buca segirada cumpleinamein. «Nus essan vinavon visai sin il sustegn dalla populaziun, dalla vischnaunca e dil cantun», di André Schmid. Il Forum cultural Tujetsch ei denton perschuadius che la ruina dil casti da Putnengia vegn ad enrihir la vallada e cunzun la historia locala.

Ulteriurs projects

Dapi sis onns ei il forum alla tscherca da localitads per in archiv cultural. Dapresent survescha igl archiv communal a differentas intenziuns, denton buc agl intent principal d'in ver archiv cultural. Differentas localitads ein vegnidas examinadas entochen ussa, ina soluziun ei denton aunc buca stada pussevla. La suprastonza tscherca vinavon in local adattau per in tal archiv. In bien resun ha la notg da film all'entschatta d'uost catta. Rodund 100 persunas han nezegiau la caschun da veser in film vegl davart il puresser dalla Val Tujetsch. Igl arranschament ei vegnius completaus d'ina, produziun da "Movie Encarden" e d'in film actual. Sin fundament dil bien interess vegn quel'occorrenza repetida ils onns vegnents. La finamira dils organisaturs ei da porscher in program attractiv ton per ils giuvens, per ils vegls, sco era per ils hospis da vacanzas. Plinavon ei il Forum cultural Tujetsch dapresent lundervi d'edir il calender pigl onn 2005. Quel cuntegn fotografias veglias da Lucas Berther, in iniziant e promotur dil turissem e dalla hotellaria dalla Val Tujetsch.